

मार्निंग डोगरी न्यूज बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै विजय बजाज।

Headlines

1. सी.पी. राधाकृष्णन होर भारत दे 15में उपराष्ट्रपति होडन। राधाकृष्णन होरें कल होए दे चुनावं च इंडी गठबंधन दे मेदवार गी 152 वोटें कन्नै हराइयै जित हासल कीती।
2. लेफ्टिनेंट गवर्नर मनोज सिन्हा होरें सांबा च सेहत कैंप दा दौरा लाइयै हाइं दी मारै हेठ आए दे परोआरें लेई पूरी मदाद ते आबादकारी दा भरोसा दोआया।
3. मुखमंत्रि ओमर अब्दुल्ला होरें आखेआ ऐ जे जम्मू-कश्मीर च, ब्याहें-शादिएं लेई देसै दी इक प्रमुख थाह बनने दी पूरी-पूरी समर्थ मजूद ऐ।
4. कुलगाम दे गुड्डर इलाके च सुरक्षाबलें दा अभियान कामयाबी कन्नै संपन्न। सुरक्षाबलें द'उं आतंकवादिएं गी मारी-मुकाया ते थेआर-असलाह ते गोला-बरूद बरामद कीता ऐ।
5. जम्मू-कश्मीर स्कूली शिक्षा बोर्ड दे ड्रैक्टर अकैडमिक्स हुं'दे आसेआ जारी इतलाह मूजब जम्मू-कश्मीर ते लद्दाख केन्द्र शासित प्रदेशें च अज्ज लैते जाने तय होए दे 10मीं ते 11मीं जमात दे म्तेहानें गी अगड़ा पाई दिता गेआ ऐ। जम्मू च अज्ज केइएं दिनें मगरा स्कूलें गी परतियै ऑनलाईन क्लासें लेई खोलेआ गेआ ऐ।

हून खबरें दी तफसील कन्नै श्रुति खजूरिया ।

<><><><><><>

VP-Elect

एनडीए दे मेदवार ते महाराष्ट्र दे गवर्नर सी.पी राधाकृष्णन होर भारत दे नमें उपराष्ट्रपति होडन। उनें आई.एन.डी.आई ब्लॉक दे मेदवार ते सुप्रीम कोर्ट दे साबका जज बी. सुदर्शन रेड्डी होरें'गी 152 वोटें कन्नै

हराया। राधाकृष्णन होंरें गी 452 वोट हासिल होए जिसले कि बी. सुदर्शन रेड्डी होंरें गी 300 वोट हासिल होए। नवनिर्वाचित उपराष्ट्रपति सी.पी राधाकृष्णन होंरें इस जित गी राष्ट्रवादी विचारधारा दी जित दस्सेआ। उनें 2047 तगर भारत गी विकसित मुल्ख बनाने दी दिशा च कम्म करने दा संकल्प लैता। राष्ट्रपति द्रोपदी मुर्मू ते प्रधानमंत्री नरेंद्र मोदी होंरें उप-राष्ट्रपति दा चुनांस जितने लेई सी.पी राधाकृष्णन होंरेंगी बधाई दिती।

तोआई लेफ्टिनेंट गवर्नर मनोज सिन्हा होंरें भारत दे उपराष्ट्रपति दे औहदधे लेई होए दे चुनांस च जित हाल करने पर सी.पी. राधाकृष्णन होंरेंगी मुबारकबाद दिती ऐ। श्री सिन्हा होंरें आखेआ ऐ जे राधाकृष्णन हुंदा ज्ञान, नजरिया ते सार्वजनिक जीवन दा इक बड्डा तजुर्बा, राष्ट्र दे विकास ते खुशहाली दी जातरा च होर मजबूती आहनने दा कम्म करोग।

<><><><><><>

LG-Samba

उपराज्यपाल मनोज सिन्हा होंरें सेहत मैहकमे ते एम्स जम्मू आसेआ साम्बा दी केसो मन्हासा थाहर आयोजित सेहत शिविर दा दौरा लाया। एह शिविर हाडें करी प्रभावित परौआरें लेई आयोजित कीता गेआ ऐ। लोकें कन्ने गल्ल करदे होई एल.जी होंरें पुर्णबहाली ते प्रभावित ढांचे गी परतिए ठीक करने लेई पूरी मदद ते समर्थन दा भरोसा दोआया। उनें आखेआ जे केंद्र ते जम्मू-कश्मीर प्रशासन राहत ते पुर्णबहाली आहले कम्मै लेई बचनबद्ध ऐ। करसानें गी होए दे नुकसान बारें गल्ल करदे होई उनें आखेआ जे करसानें गी पी.एफ फसल बीमा योजना ते एच.ए.डी.पी राएं लाह ठोआना लोडचदा। उपराज्यपाल होंरें एम्स विजयपुर कश देवक पुल गी पुज्जे दे नुकसान दा बी जायजा लैता।

<><><><><><>

CM-Wedding

मुख्यमंत्री उमर अब्दुल्ला हों आखेआ जे जम्मू-कश्मीर च डेस्टीनेशन वेडिंग टूरिज्म दी बड़ी मती समर्थ मौजूद ऐ। उनें आखेआ जे इस समर्थ थमां लाह ठोआने लेई जत्न कीते जा करदे न तां जे एह थाहर मुख्यै च डेस्टीनेशन वेडिंग लेई इक प्रमुख थाहर बनियै उभरै। एह गल्ल मुख्यमंत्री हों SKICC च Indian Chamber of Event Industry आसेआ आयोजित Hindustan 2025 wedding planners Expo दा उद्घाटन करने मगरा आक्खी। मुख्यमंत्री हों आखेआ जे दुनिया भरै च कश्मीर अपनी खूबसूरती लेई मशहूर ऐ। उनें आखेआ जे केई सारियां साहसिक, धार्मिक थाहरां न। इस मौके पर बोलदे होई उनें आखेआ।

<><><><><><>

Union Sec Handicrafts

केन्द्री कपड़ा मंत्रालय दिएं सचिव नीलम षम्मी राव हों जम्मू-कश्मीर च दस्तकारिं ते हत्थखड्डिं सरबंधी खेत्तरें दा जायजा लेंदे होई छड़ा प्रमाणिक ते भरोसेमंद उत्पादे गी बढ़ावा देने ते नकली उत्पादे पर रोक लाने लेई जांच ते प्रमाणन आहली इक तगड़ी प्रणाली दी जरूरतै पर जोर पाया ऐ। श्रीनगर दे अपने दौरे दरान केन्द्री कपड़ा सचिव हों सभनें सरबंधत धड़ें कन्ने गल्लबात करदे होई निर्यातें गी बढ़ावा देने, कारीगरें गी मदाद देने ते बजारें दी पुज्ज बधाने सरबंधी योजनाएं पर चर्चा कीती। उनें कल्याणकारी योजनाएं, जि'आं पेंशन योजनाएं ते कारीगरें दे बच्चें लेई वजीफा योजनाएं दे दायरे दा विस्तार करने दी जरूरतै पर जोर पाया तांजे इस खेत्तर गी मजबूती दिती जाई सकै ते कन्ने कम्म-रोजगार दे मौके च बी सुधार होऐ। सचिव हों दस्तकारी उत्पादे पर जीएसटी दिएं दरें च हाल च कीती गेदी कटौती दी सराहना कीती। इस मौके पर मीडिया कन्ने गल्लबात करदे होई उनें आखेआ

<><><><><><>

GST-Reforms Handicrafts

जम्मू-कश्मीर दे बसनीकें ते कारोबारिं हाल च जीएसटी दी दरें च कीती गेदी कटौती दी घोषणा दा सौआगत कीता। इस घोषणा तैहत केई सारी चीजे च बदलाव होगा। इस महीने दी 22 तरीक थमां हत्थ कन्ने बनी दिएं

चीजे पर 12 फीसद दे बजाय 5 फीसद टैक्स लग्गोग। एहदे च लकड़ी ते धातु कन्नै बनी दियां मूर्तियां, चित्रकला, लकड़ी कन्नै बने दे उत्पाद, टेराकोटा कन्नै बने दा रसोई दा समेयान वगैरा शामिल ऐ। इस गेंs कन्नै ग्रामीण आजीविका, मुकामी रिवायती कलाएं ते भारत च बने दे उत्पादें गी बढ़ावा थ्होग। आकाशवाणी समाचार कन्नै गल्ल करदे होई किश उपभोक्ताएं आखेआ जे एहदे कन्नै लोके गी बड़ी मती राहत थ्होग ते लोके गी भारतीय उत्पाद खरीदने लेई प्रोत्साहन थ्होग। उनें आखेआ।

<><><><><><>

ते हुन बाकि दिएं खबरें कन्नै विजय बजाज।

Kungul Op guddar

कुलगाम जिले च सुरक्षाबले आसेआ चलाए गेदे अभियान च बले गी बड़ी सफलता हासिल होई ऐ। इस टाकरे च लश्कर-ए-तैयबा दे 2 सिरे दे आतंकवादी मारे गे न। भारतीय सेना दी चिनार कोर नै जानकारी दिती ऐ जे मारे गेदे इक आतंकवादी दी पंछान पाकिस्तानी बसनीक रहमान दे तौर पर होई ऐ। दुए दी पंछान शोपियां दे बसनीक अमीर अहमद डार दे तौर पर कीती गई ऐ। सुरक्षाबले टाकरे आहली थाहर थमां असला बरूद ते होर दुआ समेयान बरामद कीता ऐ। सेना नै जम्मू-कश्मीर गी आतंकवाद मुक्त बनाने दे प्रति अपने धेड़यै गी फी दोहराया ऐ।

<><><><><><>

Exam Postponed

जम्मू-कश्मीर ते लद्दाख केन्द्र शासित प्रदेशें च अज्ज लैते जाने तय होए दे 10मीं ते 11मीं जमात दे म्तेहानें गी अगड़ा पाई दिता गेआ ऐ। जम्मू-कश्मीर स्कूली शिक्षा बोर्ड दे डरैक्टर अकैडमिक्स हुं'दे आसेआ जारी इतलाह मूजब, डोडा जिले च बने दे कानून-बवस्था दे हालात ते आओजाई पर बंदिशें दे चलदे एह फैसला लैता गेआ ऐ। जम्मू-कश्मीर स्कूली शिक्षा बोर्ड दे डरैक्टर अकैडमिक्स होरें इस फैसले दा ऐलान करदे होई आखेआ ऐ जे

विद्यार्थिं दी सुरक्षा, सब्भनें शा पैहली प्राथमिकता ऐ। उंनें इब्बी आखेआ जे एकडे म्तेहानें लेई तरीकें दा ऐलान तौले गै कीता जाहग। विद्यार्थिं ते उं'दे माता-पितां गी सलाह दिती गई ऐ जे ओह इस मतल्लक मती जानकारी लेई बोर्ड दे अधिकारिक चैनलें कन्नै जुड़े दे रौहन।

<><><><><><>

Schools Reopened

खित्ते च भारी बरखें ते हाड़ें दे चलदे केइएं दिनें तोहड़ी बंद रौहने मगरा जम्मू च अज्ज स्कूलें गी परतियै ऑफलाईन क्लासैं लेई खोली दिता गोआ ऐ। पिच्छले दिनें बने दे खराब मौसम दे चलदे प्रभावत होए दे विद्यार्थिं ते अध्यापकें लेई इसी इक महत्वपूर्ण गैह दे तौर पर दिक्खेआ जा'रदा ऐ। प्रशासन नै इस गल्लै दा जकीन दोआया ऐ जे स्कूलें गी परतियै खोलने शा पैहले सुरक्षा सरबन्धी सब्भे लोइचदे हीले करी लैते गेदे न। विद्यार्थिं ते उं'दे माता-पितां स्कूलें गी परतियै खोलने दे फैसले दा सोआगत करदे होई एह मेद बुज्झी ऐ जे अगगे बच्चें दी पढ़ाई च कुसै किस्मै दा कोई विघ्न नेई पौग ते उं'दी पढ़ाई दा नुकसान बी नेई होग। इस सरबन्धै च आकाशवाणी समाचार कन्नै गल्ल करदे होई 12मीं जमात दे इक विद्यार्थी नै आखेआ

<><><><><><>

Highway

जम्मू-श्रीनगर राश्ट्री जरनैली सिड़क 9वें दिनें तोहड़ी बंद रौहने दे मगरा अज्ज हौली मोटर गइडिं दी आओजाई लेई खुल्ली जाने दी मेद ऐ। राश्ट्री जरनैली सिड़कें सरबन्धी भारती प्राधिकरण नै आखेआ ऐ जे हालात गी दिक्खदे होई गै बइडी मोटर गइडिं दी आओजाई दी खुल्ल दिती जाहग कीजे सिड़कें पर सफर करने आहले लोकें दी सुरक्षा, उं'दी सब्भनें शा पैहली प्राथमिकता ऐ। तोआई ऐतिहासिक मुगल रोड पर गइडिं दी आओजाई, बवस्थित ढंगगै कन्नै होआ करदी ऐ।

<><><><><><>